



EDITORIAL

Atubangon ang mulo sa minilyon taliwala sa krisis

Walay hunong ang paggrabe sa katilingbanon ug ekonomikanhong kahimtang sa katawhang Pilipino ilalum sa rehimeng Duterte bunga sa paantus niining mga palisiya. Kanunay pakyas ang inadlaw-adlaw nga pakigbisog sa indibidwal aron mabuhi. Ginaitsahan sila ni Duterte og salin-salin nga mumho samtang ginabusog ang dagkung oligarkong katagbawan.

Ang nagatunhay nga kundisyon nagaduso sa mga rebolusyonaryong pwersa nga hatagag atensyon ang singgit sa lapad nga masa alang sa hinanali ug malungtarong solusyon sa ilang mga mulo, aron hiusahon ang kusog sa minilyon ug epektibong iasdang ang ilang mga katungod ug kaayuhan.

Misulbong ang kasuko sa minilyong Pilipino tungod sa grabeng dili maantus nga kahimtang sa kawalay trabaho, kawalay balay, ubos nga kita, taas nga presyo, kakulangan sa batakang utilidad ug katilingbanong serbisyo, kakulangan sa sub-

sidyo sa guberno, pagkadaut sa mga imprastrukturang pangpubliko, pagpangilog og yuta ug dislokasyon sa kabukiran, ug uban pang magun-ubong epekto sa mga kontra-kabus nga palisiya sa rehimeng Duterte. Padayon nga nagkadaghan ang mga nabuhi sa kalisud.

Sa mga syudad ug lungsod, adlaw-adlaw nga ginapaantus ang masang kabus sa kawad-on sa limpyong tubig, taas nga balayrunon sa kuryente, dunot nga sistema sa pangpublikong transportasyon ug trapik, ug taas nga gasto sa edukasyon, presyo sa lana ug singil

"Atubangon..." sundi sa panid 2

16 ka armas, nakumpiska sa CL ug ST

DUHA KA MAGKASUNOD nga aksyong militar ang gilunsad sa mga yunit sa Bagong Hukbong Bayan (BHB) sa Bulacan ug Oriental Mindoro niadtong Pebrero 25 ug 26. Nakasakmit dinhi ang mga Pulang manggugubat og 16 ka armas ug pagkaparalisa sa usa ka kumpanya nga magun-ubon sa kinaiyahan.

Bulacan. Malampuson nga gireyd sa BHB-Bulacan ang upisina ug detatsment sa Seraph Security Agency (SSA) sa Barangay San Isidro, San Jose Del Monte City, Bulacan niadtong Pebrero 25, alas-7:14 hangtud alas-9 sa gabii. Nakumpiska sa BHB ang 12 ka tag-as nga kalibrenghing armas, duha ka pistola, mga bala ug pito ka Icom radio.

Adunay kapin 40 ka armadong gwardya ug maton ang SSA nga nagsilbing pwersang pangseguri-

"16 ka armas..." sundi sa panid 3

sa komunikasyon. Kining tanan ginapailalum sa pribatisasyon ug ginapadagan sa ngalan sa tubo. Gatusan ka libo ang walay disentang pabalay nga nagaatubang sa sulayng pagpalayas sa ilang mga payag sa ngalan sa paglimpyo sa kinaiyahan samtang ginaduso ang magun-ubong reklamasyon aron ihaon sa dagkung negosyo nga hakog sa yuta.

Subsub ang pagduso sa kumbersyon sa yuta aron hatagag-dalan ang konstruksyon sa mga dam, operasyon sa pagmina, turismo ug enerhiya, ug mga proyektong pang-imprastruktura, lakip na ang pagpalapad sa mga plantasyon. Dugang pa niini ang labaw nga liberalisasyon sa pag-import og bugas ug uban pang pamatigayong pang-agrikultura nga hulga sa lokal nga produksyon ug panginabuhian sa kabanikanhan.

Nagpabiling taas ang disempleyo atubangan sa pagkunhod sa ihap sa namugna nga bag-ong trabaho sa pinakaubos nga ang-ang sa duha ka dekada, bunga sa daghang tuig nga

pagkahagba sa lokal nga produktibidad. Sa inadlaw-adlaw, liboan ang natukmod nga mogawas sa nasud aron mahimong kontraktwal nga ubos ang kita.

Daku nga palas-anon sa katawhang Pilipino ang rehimeng Duterte. Pabug-at nga buhis ang gipahamtang niini sa katawhan. Nagpakainutil kini, walay katakus ug walay pakabana sa singgit sa katawhan aron pugngan pagkahagba sa kalidad sa ilang kinabuhi.

Gatasan ka bilyong piso nga pondong pangpubliko ang ginabulsa sa mga dunot nga upisyal sa dagway sa mga suhol, soborno ug pork barrel, ginakawkaw sa mga ginapaburang pribadong negosyo sa porma sa mga proyekto ug kontrata sa gubyrno, ug ginawaldas sa hilabihan ka gasto nga mga kahimanan ug operasyong militar. Nagatipig og bahandi ang mga hilabihan ka dato na nga oligarko. Naglunang sila sa luho ug kaharuhay samtang nalunod sa kagutom ug grabeng kawad-on ang mayorya sa katawhan.

Atubangan sa nagabukal nga kasuko sa katawhan, ginapatuman






sa rehimeng Duterte ang mga langang nga sama sa gitawag og "universal health care," "conditional cash transfer," "reporma sa yuta," mga proyektong pabalay ug uban pang programang "pangkaayuhan." Kini pulos mga pakitang-tawo ug pangtapak nga nagatabon ug nagapabilin lamang sa pribatisasyon, pagkibhang sa katilingbanong badyet, deregulasyon, malukpanon nga kumbersyon sa yuta ug uban pang magun-ubong palisiyang neoliberal.

Tinguha sa mga Duterte—hari sa burukrata-kapitalismo—ug iyang mga alyado, nga magpabilin sa poder ug pribilehiyo. Lain-laing gyera ang gisugdan sa iyang rehimen aron manghulhog sa panatisismong pasista ug hatagag lapad nga gahum ang militar ug pulis sa kaalautan sa demokratikong katungod. Sa despotikong paggamit sa estado poder ug kabangis, ginasumpo niini ang tanang porma sa makatarunganong oposisyon ug ginabusalan ang mulo sa katawhan.

Atubangan sa laygay nga katilingbanon ug ekonomikanhong kondisyon ug kawalay-kalooy sa rehimeng Duterte, walay laing kadangpan ang katawhang Pilipino kundili ang kolektibong mosinggit ug iduso ang ilang mga pangayo. Ang gidaghanon nila maoy kusog nga kinahanglang huptan.

Aron iasdang ang ilang demokratikong pakigbisog, nanawagan ang Partido sa tanang aktibista nga molubog sa masa ug itransporma ang kasuko sa katawhan sa kalihukang masa. Kinahanglan nga tukmang matahagag-atensyon ang kaayuhan, yangungu ug tinguha sa katawhan.

Kinahanglan nga wala silay kapuol sa pagkampanya aron pukawon ug palihukon ang masa sa tumong nga atubangon ug sulbaron ang dagku ug gagmay nga suliran nga nagpaantus kanila sa inadlaw-adlaw. Regular nga ilunsad ang mga pangmasang asembliya para hisgutang ang mga isyu ug aron mapahungaw sa katawhan ang ilang mga panglantaw. Sa kasamtangang kampanya sa eleksyon, obligahon

 <p>Bolyum L Ihap 5 Marso 7, 2019</p> <p>Ang <i>Ang Bayan</i> ginapagawas sa pinulongang Pilipino, Bisaya, Iloco, Hiligaynon, Waray ug Ingles. Nagadawat ang <i>Ang Bayan</i> og mga kontribusyon sa porma sa mga artikulo ug balita. Ginaawhag usab ang mga tigbasa nga magpadangat og mga puna ug rekomendasyon sa pagpalambo sa atong mantalaan.</p> <p>  instagram.com/progressiveviews  @prwc_info  fb.com/groups/prwcnewsroomv2  cppinformationbureau@gmail.com </p>	<h2 style="text-align: center;">Unod</h2> <hr/> <p>Editorial: Atubangon ang mulo sa minilyon taliwala sa krisis 1</p> <p>16 ka armas, nakumpiska sa CL ug ST 1</p> <p>Marso 2019, Bulan sa BHB 4</p> <p>Mga deklarasyong "kontra-BHB" 4</p> <p>Mga menor-de-edad, giaresto sa AFP 5</p> <p>Kahimtang ug pagsukol sa kababayan-an 6</p> <p>Pinalanat nga <i>leave</i> sa mga inahan 7</p> <p>Manila Baywatch, gilunsad 7</p> <p>Protesta sa mga nars 8</p> <p>Ika-100 ka tuig sa Comintern 8</p> <p>DPRK, wala nagpaulipon sa US 8</p>
<p>Ang <i>Ang Bayan</i> ginamantala duha ka hugna matag bulan sa Komite Sentral sa Partido Komunista ng Pilipinas</p>	

"Atubangan...", gikan sa panid 2

ang mga kandidato nga moatubang sa katawhan ug tubagon ang ilang mga pangayo.

Kinahanglang gamiton sa mga aktibista ang matag higayon nga magpropaganda, sa mga grupong diskusyon man, o sa pagpanghatag og polyeto, o pagpamulong diha sa kalsada, bus, dyip ug klasrum. Itransporma sa mga sentro sa aktibismong pangmasa ang mga komunidad, pabrika, uban pang lugar sa pagpanginabuhian, eskwelahan ug uban pa.

Kinahanglan usab sila nga magpakahanas sa ahitasyon ug pagpukaw sa katawhan nga molihok aron papanubagon ang reaksyunaryong gubyerno sa gipahamtang niining pabug-at nga buhis, pagpugong sa umento sa suhulan, grabe nga pagpangutang, pagbaligya sa patrimonya sa nasud ug uban pang lakang nga kontra-kabus ilalum sa mga palisiyang neoliberal. Kinahanglang labaw nga ipataas ang kahimatngon sa katawhan sa pagbutyag sa pagpangamuyo sa rehimen sa pangpinansya ug pangkomersyong interes sa mga imperyalista.

Kinahanglang pakusgon ang determinasyon sa masa nga iduso ang ilang mga sosyo-ekonomikanhong ka-

tungod, lakip na ang mga demokrati-kong katungod, atubangan sa gipagrabeng pagpanumpo sa estado. Kinahanglan nilang ibutyag ang kalambigitan sa paggrabe sa pasismo sa katingbanong krisis, ug sa pagkapuliki sa nagharing pundok ni Duterte nga pugngan ang katawhan nga mobarug nga nakakumkum ang kamao. Kinahanglang himuong tin-aw kaayo ang panginahanglan alang sa nasudnon-demokratikong pakigbisog.

Kinahanglang motabang sila nga labangon ang pagkasiak-siak ug disorganisasyon ug madasigon nga tukuron ang tanang porma sa organisasyong masa aron barugan ang interes ug pangayo sa katawhan. Tukuron ang mga lokal ug nasudnong alyansa subay sa kumon nga sektoral ug makihut-ong nga interes, ug palihukon ang katawhan sa mga demonstrasyon sa tibuok lungsod, prubinsya, rehiyon ug nasud.

Pabor alang sa paspas nga pagdaghan sa Partido ang nagatunhay nga sitwasyon. Kinahanglan nga epektibong pangulohan sa mga nangunang kadre sa Partido ang praktikal nga gimbuhaton sa mga aktibista ug mahimong sumbanan sa walay kapuol nga pagpropaganda ug pag-organisa sa masa. Kinahanglang hugot sila nga maglunsad

og mga pag-tuon sa ideolohiya, mag-ases ug magsumada, ug kanunay nga ipataas ang ang-ang sa gimbuhaton. Ang abanteng mga aktibistang masa kinahanglang paspas nga rekruton sa Partido. Kinahanglang magtukod og liboan ka bag-ong sangay sa Partido, ug palapdon ug pakusgon ang mga natukod na.

Sa maintuson nga pagpropaganda ug pag-organisa, ug hustong pagsubaybay sa ang-ang sa kahimatngon sa masa, hustong mapukaw sa Partido ug mga rebolusyonaryong pwersa ang masa aron ilang ilunsad ang nagkadakung mga kalihukan. Kung buot hunahunaon daw uga nga kumpay ang kahimtang sa katawhan, gikan sa gamay nga aligato, modilaab ang dakung kalayo sa pagsukol sa masa.


Samtang ginapakusog ang pakigbisog sa katawhan alang sa ilang mga ekonomikanhong katungod ug kaayuhan, kinahanglan usab nga magbantay batok sa repormismo, ekonomismo, sektoralismo ug uban pang tendensya nga nagababag sa paglambo sa rebolusyonaryong kahimatngon sa katawhan. Ang inadlaw-adlaw nga pakigbisog sa katawhan kinahanglang molambigit, mosuporta ug motabang sa pagpakusog sa gubat sa katawhan. **AB**

"16 ka armas...", gikan sa panid 1

dad sa Ayala Lands ug Bangko Sentral ng Pilipinas (BSP). Ginailog niini ang kapin 700 ka ektaryang yuta sa mga maguuma ug katutubong Dumagat ug Remontados.

Matud ni Ka Jose Del Pilar sa BHB-Bulacan, pinaagi sa SSA, kundili ginahadlok pugos nga ginapalit sa Ayala Lands ug BSP sa hilabihan ka ubos nga kantidad ang mga umahan ug yutang kabilin sa mga residente. Resulta niini, kapin 200 ka pamilya na ang napalayas sa maong barangay.

Oriental Mindoro. Giparalisa sa BHB-Mindoro ang operasyon sa Sta. Clara Power Corporation (SCPC), usa ka magun-ubong kumpanya sa mina ug enerhiya, niadtong Pebrero 26, bandang alas-3 sa hapon sa Barangay Malvar, Naujan, Oriental Mindoro. Giparalisa sa BHB ang *batching plant* sa kumpanya ug 44 ka piraso sa mahinungdanon nga *heavy equipment* lakip ang usa ka *backhoe*, lima ka trak nga *bigfoot*, duha ka *payloader*, usa ka *crusher* ug usa ka



cement mixer. Nakumpiska usab sa mga operatiba ang usa ka pistolang 9mm, usa ka *shotgun* ug walo ka *Icom radio*.

Matud ni Ka Madaay Gasic, tigpamaba sa BHB-Mindoro, nga ang maong aksyon tubag sa panawagan sa katawhan sa Mindoro alang sa hustisya bunga sa grabeng kaudat nga dala sa proyektong hydro sa SCPC sa Naujan ug Baco sa maong prubinsya. Niadtong bagyong "Nona" sa 2015, kapin 3/4 sa populasyon sa prubinsya ang naapektuhan bunga sa padayon nga pagpangtroso ug pagpabusikad sa SCPC sa mga kabukiran. Nagresulta kini sa mga pagdahili ug pagbaha og lapok. Kapin 10 ka residente ang namatay ug kapin P2.5 bilyong-kantidad sa produkto ug kahimanan sa agrikultura ang naguba.

Samtang ginalunsad ang aksyon, gitipok sa mga Pulang manggugubat ang mga mamumuo sa SCPC ug gipatin-awan mahitungod sa hinungdan sa maong punitibong aksyon. **AB**

Marso 2019, gideklara isip "Bulan sa BHB"

Isip pagsaulog sa ika-50 nga anibersaryo sa Bagong Hukbong Bayan (BHB) sa umaabot nga Marso 29, nanawagan ang Partido Komunista ng Pilipinas (PKP) niadtong Pebrero 26 sa tanang mga rebolusyonaryong pwersa nga ideklara ang Marso 2019 isip "Bulan sa BHB." Pagsaulog kini sa tanang mga kadaugan ug pag-abante sa gubat sa katawhan sa tanang natad.

Gihagit sa PKP ang mga rebolusyonaryong pwersa nga ipakita ang tinuod nga hukbo sa katawhan sa temang "Iaslang ang gubat sa katawhan hangtud sa kadaugan!" Tubag kini sa walay-lurang nga pasintang mga atake sa rehimeng Duterte ug sa nagkagrabeng kahimtang sa katawhan.

Kadungan sa pagsaulog, gilau-man ang mga taktikal nga opensiba sa mga yunit sa hukbong bayan sa tibuok nasud aron panalipdan ang katungod sa katawhan, kadungan ang pagpaaslang sa tinuod nga reporma sa yuta ug pagtukod sa mga organisasyong masa hangtud sa mga organo sa pulitikanhong gahum.

Kadungan usab ang pagsilot sa pinakalunod-patay nga mga ahente sa rehimeng Duterte. Atubangan sa

mga pagsulay sa rehimen nga pugngan ang pagkaylap sa mensahe sa rebolusyonaryong armadong pakigbisog, kinahanglang pasubsubon ang pang-impormasyon, pang-edukasyon ug pangpropagandang kampanya aron ipakaylap ang kahusto sa paglunsad sa armadong pakigbisog.

Giawhag sa PKP ang tanan nga magmugna og mga pamahayag, mga poster ug brochure sa rekrutment, magsulat og mga tula, kanta ug sugilanon, magmugna og mga painting ug uban pang minugnang arte, ug maglunsad og mga demonstrasyon. Maksimisahan ang internet ug social media aron ipakaylap ang rebolusyonaryong tahas sa BHB. Ipanghimakak ang "teroristang" pagbansag sa rehimeng US-Duterte ug ipakita kung kinsa ang tinuod nga terorista.



Ang tibuok bulan sa Marso kahigayunan aron awhagon ang pinakadaghang masang aktibista pareho sa kasyudaran ug kabanikanhan nga mosampa sa BHB, subli-sublion ug ipakaylap ang panawagan: "Alagaran ang katawhan! Alagaran ang rebolusyon!" Ingonman, gamiton ang pagsaulog aron patas-on ang kapasidad sa mga Pulang kumander ug manggugubat sa natad sa ideolohiya, pulitika ug organisasyon.

"Atong hatagag-duso ang pagpanglimbasog ug optimismo sa katawhang Pilipino sa pagpaaslang sa gubat sa katawhan padulong sa mas taas nga ang-ang ug nagkaduol sa pagkab-ot sa hingpit nga kadaugan," panak-up sa PKP. AB

Mga deklarasyong "kontra-BHB," pakana sa AFP

RESULTA SA PAGPAMIG-OT ug saywar sa Armed Forces of the Philippines (AFP) ang mga pagdeklara sa Bagong Hukbong Bayan (BHB) isip "persona non grata" (tawong dili ginadawat). Kini ang gibutyag ni Ka Rigoberto F. Sanchez sa BHB-Southern Mindanao Region human nga nabalita ang pagkundera kuno batok sa BHB, sa mga lokal nga guberno at komunidad sa Lumad sa mga rehiyong langkob AFP Eastern Mindanao Command.

Matud kang Sanchez, ang maong kampanyang saywar ug intimidasyon resulta sa mga "peace and development outreach program" nga ginalunsad ilalum sa "whole-of-nation approach" sa Oplan Kapayapaan. Sunud-sunod nga mga "peace-building seminar" ang ginapatawag sa militar sa Davao City, Davao Oriental, Compostela Valley, Davao del Norte, Bukidnon ug Caraga. Gigamit sa AFP ang ilang mga paramilitar sama sa Alamara ug Bagani, aron pig-oton ang mga konsehong Lumad nga mitambong sa maong mga seminar. Human niini, ginahaylo sila nga magmartsa dala ang mga plakard nga adunay mga kontra-insurhen-

syang panawagan.

Sa maong mga "seminar" na usab ginaduso sa militar ang batbat-sa-korapsyon nga Enhanced Comprehensive Local Integration Program nga mas naila isip mga pekeng pagpasurrender. Sa Compostela Valley niadtong Pebrero 20, human ang iligal nga pag-aresto sa 71st IB ang tulo ka mag-uuma sa Sityo Binogsayan, Barangay Napnapan ug giprisinta sila isip mga "misurrender" nga BHB. Luyo kini sa subsub nga pamahayag sa mga upisyal sa lokal nga guberno nga ang giaresto nga silang Eddie Avila, Graciano Embalsado ug Pulpy Lariwan, pulos mga sibilyan nga residente sa maong baryo.

Gawas niini, ginadaut usab sa AFP ug ginatawag nga mga prente sa PKP ang mga ligal nga organisasyon, progresibong partylist ug mga non-government institution nga tigpanalipod sa katungod ug kaayuhan sa mga mag-uuma ug Lumad. Sa ingon, ginabutang sa kakuyaw sa AFP ang maong mga sibilyang institusyon ug ilang mga lider isip target sa mga arbitraryong pagpangaresto ug pagpamatay. AB

Mga menor-de-edad, iligal nga giaresto sa AFP

Duha ka menor-de-edad nga estudyante ang iligal nga gidakop ug giditine sa mga sundalo sa 88th IB sa Sityo Sanggiapo, Barangay Sinuda, Kitao-
tao, Bukidnon niadtong Pebrero 18, alas-11 sa buntag. Walay hinungdan nga giaresto sa mga sundalo silang Loujean Antian Lumbatan, 17, estudyante sa Sinuda High School, ug Ara Mystica Antian Pangcat, 10, estudyante sa Cabalansihan Elementary School. Gitago sila sulod sa kampo hangtud sa alas-11 sa maong gabii.

Sa dihang giadtoan sa mga ginikanan ug paryente sa kampo, dayag nga gilimod sa mga sundalo nga anaa kanila ang duha ug giabog ang mga nangita. Matud sa saysay sa mga biktima, sa mao mismong panahon gihulga sila sa mga sundalo nga dili magbanha. Human niini, gidala ang mga biktima sa *head quarter* sa 88th IB sa Maramag kung asa sila gipailalum sa grabeng interogasyon. Gibuhian sila sa mga sundalo niadtong Pebrero 19 sa hapon.

Terorismo sa Negros

Padayon nga ginabiktima sa mga armadong pwersa sa rehimen ang mga sibilyang residente sa Negros. Dugang sa mga paglapas sa mga sundalo ug pulis ang mga kaso sa intimidasyon, pagpanunog ug iligal nga pagpangaresto. Nag-unang mga susppek ang mga sundalo sa 94th IB ug ginsakpan sa Philippine National Police (PNP) Regional Office 7.

Intimidasyon. Giharang sa mga elemento sa 94th IB niadtong Marso 9 ang kapin 400 ka delegado sa usa ka *humanitarian mission* nga nagtumong nga hibaluon ang kahimtang sa mga komunidad nga kasamtangang ginaokupa ug ginasabwagag teror sa mga armadong pwersa sa estado sa Guihulngan City, Negros Oriental. Gitukod ang delegasyon sa lain-laing organisasyon ug pormasyon nga gustong makighiusa sa mga biktima sa mga pasista ug semi-"Tokhang" nga mga atake sa mga tropa sa 94th IB ug PNP sa mga residente sa Guihulngan sa takuban sa Synchronized Enhanced Managing of Police Operations (SEMPO) o Oplan Sauron.

Ang pinakaulahing nataho nga

kasong sa atake sa 94th IB mao ang pagsunog sa balay ni Tisoy Pasinabo sa Sityo Panagtugas, Barangay Trinidad sa maong lungsod niadtong Pebrero 24, alas-3 sa kaadlawon. Lakip ang pamilya ni Pasinabo sa 87 ka residente nga napugos nga mobakwit niadtong Enero 28 tungod sa walay lurang nga pagpamig-ot kanila sa mga sundalo.

Temporaryong nagpasilong sa San Carlos City, Negros Occidental ang mga bakwit. Nakitaan sa mga duktor ang mga biktima og mga timailhan sa troma tungod sa kahadlok ug kabalaka nga gibunga sa nagapadayon nga operasyong militar sa ilang mga komunidad. Sa usa ka interbyu, gisaysay sa usa ka tigulang nga babayeng residente sa Sityo Kasingan nga dili siya makatulog sukad nga miabot ang mga sundalo.

Militarisasyon. Gitaho sa mga residente nga niadtong Pebrero 21-24, mokabat na sa 110 ka sundalo ug pulis ang miokupa sa mga sityo sa Tabalogo ug Malatanglad sa Barangay Budlasan, Canlaon City, Negros Oriental. Nagbunga og kahadlok sa mga residente ang pagbalay-balay sa mga sundalo ug pagpangimbestiga.

Iligal nga pagpangaresto. Niadtong Pebrero 22, alas-2 sa kaadlawon, iligal nga giaresto sa giusang mga tropa sa 94th IB, PNP-Criminal Investigation and Detection Group ug Special Action Force, sa pagpanguna ni PS/Insp. Ruben E. Verbo Jr., ang lima ka sibilyan sa Barangay Budlasan, Canlaon City, Negros Oriental. Naila ang mga biktima nga silang Guillermo Casi-



pong Sr., 62, mga anak niya nga silang Jerome ug Guillermo Jr., Emilio Mahinay ug Francino Maribong. Samtang ginaimbestigahan, ginatunahan og pusil sa mga sundalo ang ulo ug gibaharang patyon si Mahinay. Kasamtangang nakadetina ang mga biktima sa Canlaon City Police Station. Sa Mabinay, iligal usab nga giaresto niadtong Pebrero 15 ang lider mag-uuma nga si Nimrod Balansag sa KAUGMAON-Kilusang Magbubukid ng Pilipinas (KMP). Pulos gipasakaan og gama-gamang mga kasong *illegal possession of firearms* ang mga giaresto.

Sa pamahayag sa KMP niadtong Marso 3, gikundena niini ang pagarangkada sa mga pasistang atake batok sa mga mag-uuma sa prubinsya nga ginapatuman ilalum sa Memorandum Order 32 sa rehimeng US-Duterte nga pormal nga nagpailalum sa tibuok Isla sa Negros sa walay taning nga pagharing militar. Nanawagan kini sa independyenteng imbestigasyon mahitungod sa paggamit sa AFP ug PNP sa Oplan Sauron isip himan sa paglapas sa katungod-tawo.

Samtang hugot nga gikundena sa mga progresibong organisasyon, tigpanalipod sa katungod-tawo, akademiko, abugado, tawong-midya ug tawong-simbahan sa Cagayan de Oro ang malisyosong paglambigit sa AFP sa ilang mga kauban sa Bagong Hukbong Bayan ug Partido Komunista ng Pilipinas. Ang maong listahan gipagawas sa 4th ID niadtong Pebrero.

Malupigon nga kahimtang ug pagsukol sa kababayan-ang Pilipino

I lalum sa semikolonyal ug semipyudal nga katilingban, wala lamang nakahiagom sa pagpahimulos ang kababayan-ang Pilipino isip mga mamumuo o mag-uuma, nakahiagom pa sila sa labaw nga pagpangdaugdaug bunga sa diskriminasyon sa kasarian ug sobinismo sa kalalakin-an.

Kumpara sa lalaki, mas ubos ang suhulan ug mas malupigon ang kahimtang sa mga babayeng mamumuo. Kadungan niini, ginahikot sila sa kulturang patriyarkal nga nagatakda sa "papel" nila sa katilingban, isip tig-atiman sa panimalay, tig-asi-kaso sa bana, tig-atiman sa anak o kinamanghurang igsoon, ginikanang tigulang ug uban pang paryente.

Labaw pang pag-antus ang nahiguguman sa kababayan-an sa pagpatuman sa rehimeng US-Duterte sa pinakagrabe nga mga palisiyang neoliberal. Mas mitaas ang oras sa ilang pagtrabaho aron makaangot sa pagsaka sa presyo sa transportasyon, pagkaon ug uban pang batakang panginahanglan. Labaw sila nga nalubong sa utang aron makaangot sa nagasaka nga singil sa mga serbisyo. Ginaantus nila ang kawad-on sa disentang mga trabaho ug makabuhi nga suhulan bunga sa kawad-on sa tinuod nga industriyalisasyon ug reporma sa yuta.

Atubangan niini, labaw nga nahimong makatarunganon ang pagsukol sa kababayan-ang mamumuo ug mag-uuma alang sa ilang mga katungod ug kaayuhan, ingon usab alang sa kaayuhan sa ilang mga pamilya. Krusyal nga mapalihok ang ilang sektor aron tapuson ang kasamtangang sistema, nag-una pinaagi sa armadong rebolusyon.

Kahimtang sa kababayan-ang Pilipino

Halos patas ang ihap sa mga kalalakin-an ug kababayan-an sa katilingbang Pilipino. Ingonman, mas ubos ang tantos sa ilang partisipasyon (49% kumpara sa 77% sa kalalakin-an) sa pwersa sa pamuo sa kasyudaran ug kabanikanhan.

Ubos ang ilang suhulan ug ubos

ang ilang oras sa pamuo. Kapin 1.2 milyong kababayan-an ang nagtrabaho sa *retail*. Nagadawat sila og suhol nga wala pa sa katunga sa makabuhi nga suhol samtang ginapatrabaho hangtud 52 ka oras matag semana nga walay bayad sa obertaym. Adunay 1.8 milyon ang nagtrabaho isip mga katabang sa panimalay, tiglaba ug uban pa. Migahin sila og 24 oras sa pagsilbi sa ilang amo matag adlaw.

Sa mga engklabo sa pamuo nga dominado sa mga langyawng kumpanya, 65-75% sa mga mamumuo ang kababayan-an. Mayorya ang kontraktwal, wala nahilakip sa mga unyon ug walay mga benepisyo sama sa *maternity leave*. Kaylap ang diskriminasyon ug pagpangabuso sa kababayan-an tungod kay gawasnon nga makamugna og grabe pa nga mga palisiya ang maong mga kumpanya nga walay regulasyon sa estado.

Sa kabanikanhan, ginapas-an sa kababayan-ang mag-uuma ang nagkagrabe pa nga kawad-on sa kaugalingong yuta bunga sa maluk-

panong pagpangawkaw ug kumbersyon sa yuta alang sa mga kumpanya sa pagmina ug plantasyon. Ginaantus nila ang padayon nga pagpamatay sa sektor sa agrikultura bunga sa walay rendang importasyon sa mga produktong agrikultural. Dugang kini sa kanhi na nilang kalisud bunga sa taas nga abang sa yuta, ubos nga presyo sa ilang produkto, usura ug uban pa.

Halos katunga sa mga Pilipinong nagagawas sa nasud mga kababayan-an. Dakung ihap kanila ang nabutang sa manwal, hugaw ug makuyaw nga trabaho kung asa wala o halos wala silay mga katungod. Wala usab silay proteksyon batok sa pisikal ug sekswal nga abuso ug pagpahimulos.

Pagpalihok alang sa rebolusyon

Sukad sa sinugdanan, matngon ang nasudnon-demokratikong kalihukan nga tungod kay katunga sa katawhan ang kababayan-an, nakasandig og daku ang kadaugan niini sa pagpalihok sa mga babaye sa tanang natad sa pagsukol. Ginaila ang kamatuoran nga mas grabe ang nasinati nga pagpaantus sa kababayan-an kaysa sa kalalakin-an. Dugang sa



ginasinati nila nga pagpahimulos, pagpangdaugdaug ug pagpanumpo, nakasinati usab sila og sobinismo sa kalalakin-an ug diskriminasyon sa kasarian.

Sa kasaysayan sa rebolusyonaryong kalihukan, ginaila ug ginahagag pagtagad ang mga isyu sa kababayan-an. Sa sayong yugto, gitukod ang Makibaka (Malayang Kilusan ng Bagong Kababaihan), nga nahimong usa sa mga alyadong organisasyon sa National Democratic Front of the Philippines. Sa unang higayon, natukod ang organisasyon sa kababayan-an nga tin-aw nga naghikyad sa pagpangdaugdaug sa sektor ug ang panginahanglan alang sa usa ka malingkawasnong kalihukan sa kababayan-an pinaagi sa pag-salmot sa usa ka nasudnon-demokratikong kalihukan.

Nahilakip usab sa programa sa Partido, pareho sa una ug ikaduhang Kongreso niini, ang pagseguro nga ginatahod ang mga katungod ug kaayuhan sa kababayan-an samtang nagarebolusyon ug sa pagatukuron nga sosyalistang katilingban. Langkob niini ang pakigrelasyon, kasal ug diborsyo, kung asa ginaseguro nga naatiman ang ilang kaayuhan. Ginaseguro sa Partido ug BHB nga adunay patas nga mga katungod ug oportunidad ang mga babaye ug lalaki sulod sa organisasyon.

Dugay na nga nakalapag ang maong mga lakang aron paweluhon ang partisipasyon sa kababayan-an sa rebolusyon. Haom karun ang kahimtang aron labaw pang padaghanon ang ilang ihap ug palargahon ang ilang katakus

sa tanang natad sa paglihok. Ginaawhag ang ilang partisipasyon sa tanang natad sa gimbuhaton—sa ekonomiya, pulitika, kultura, sa pagpangulo sa organisasyon ug gimbuhatong militar—aron dili sila malukong sa ginatawag nga gimbuhatong pangbabaye, sama sa mga gimbuhatong pangbalay, paluto, paglaba ug uban pa.

Nabati sa rebolusyonaryong kalihukan nga sa pakigbisog sa kababayan-an makab-ot ang ilang kaugalingong kalingkawasan. Kinahanglan silang awhagon ug tabangang mosukol sa diskriminasyon sa kasarian ug sobinismo sa kalalakin-an; kadungan sa pagsukol sa imperyalistang pagpahimulos ug pagpangdaugdaug, pyudal ug burukrata-kapitalista. Kinahanglan usab nga aghaton ug tabangan sa kababayan-an ang kalalakin-an nga tul-iron ang mga lama sa sobinismo nga nagatumaw pa gihapon bisan sulod sa progresibo ug rebolusyonaryong kalihukan.

Sa han-ay sa intelihensya, kinahanglang tul-iron ang ilusyon nga magkapatas na ang kababayan-an ug kalalakin-an tungod makatungha na ang mga babaye sa kolehiyo, nahimong mga propesyunal o di kaha mitaas ang ranggo sa mga korporasyon o burukrasyang sibil. Kinahanglang batukan ang konseptong "women empowerment" nga ginapakaylap sa mga imperyalista ug nagharing hut-ong nga nagpasabot lamang sa paglamon sa kababayan-an sa reaksyunaryong burukrasya o sa malinglahong mga korporasyon. AB

Pinalanat nga *leave* sa mga bag-ong inahan, balaod na

BALAOOD NA ANG *expanded maternity leave* (pinalanat nga bakasyon sa mga bag-ong inahan gikan sa ilang trabaho) human kining aprubahan ni Rodrigo Duterte niadtong Pebrero 22.

Halos usa ka dekada na kining ginaduso ug ginakampanya sa Gabriela Women's Partylist (GWP) kauban ang uban pang mga progresibong grupo ug personahe. Ila-lum sa balaod, mamahimo na nga mag-leave sa trabaho ang usa ka bag-ong inahan og hangtud 105 ka adlaw samtang nagadawat pa gihapon og suhol o sweldo. Aduna pay opsyon ang inahan nga palanaton ang iyang *leave* og usa ka bulan pero wala nay sweldo. Sa kasamtangan, anaa sa 60 ka adlaw lamang ang bayad nga *leave* sa usa ka bagong-panganak.

"Produkto kini sa among maintuson nga kampanya...kauban ang lain-laing grupo, isip pag-ila sa tampo sa mga kababayan-an sa atong ekonomiya," pamahayag sa GWP. "Usa kini ka mahinungdanong paglambo sa pagseguro sa katungod

sa mga kababayan-an sa *maternal health* (kahimsog sa mga inahan) ug sa pagpanalipod sa seguridad sa trabaho sa mga mamumuong mabdos" dugang pa sa GWP.

Bisan pa man, nagpahimangno ang Gabriela nga dili dapat magresulta sa diskriminasyon sa mga babayeng mamumuo ang maong balaod. Anaa sa 2% lamang sa mga kababayan-ang mamumuo ang mabdos. Dugang niini, kadaghanan sa mga babayeng mamumuo mga kontraktwal ug wala nagatagamtam sa bisan pinakabata kang mga benepisyo.

Sa sektor sa serbisyo ug sa mga pabrika sa mga *export processing zone*, wala ginaempleyo ang usa ka mabdos o bisan ang babayeng adunay bana tungod sa posibilidad sa pagkaburos. Kung maburos, dili na sila subling ginaempleyo. AB

Manila Baywatch, gilunsad

NAGTIPOK NIADTONG PEBRERO 22 sa simbahan sa Malate, Manila ang 200 ka myembro sa mga organisasyon sa mga mangingisda, kabus sa kasyudaran, kababayan-an, relihiyoso ug maki-kinaiyahan aron ilunsad ang alyansang Manila Baywatch nga magabantay sa pag-uswag sa kunohay rehabilitasyon ug proyektong reklamasyon sa Manila Bay.

Matud sa grupo, kung seryoso ang rehimen sa rehabilitasyon, kinahanglang nakapunting kini sa pagtukod og mga pabalay nga mamahimong ibutang sa kilid sa dagat ug mga kanal ug dili ang pagpalayas sa mga residente. Kinahanglang banhawon ang Manila Bay nga nakasubay sa panginahanglan sa mga mangingisda ug dili alang sa magun-ubong nga reklamasyon.

Usa sa makapahimulos sa proyektong reklamasyon ang embahada sa US nga nakatakdang magdugang og mga bilding. AB

Mga nars, misukol batok sa dili makitawhanong kahimtang sa pamuo

WELGA ANG HULGA sa mga nars ug mamumuo sa panglawas sa University of Santo Tomas Hospital (USTH) sa Manila City batok sa dili-makitawhanong kahimtang sa pamuo sulod sa ospital.

Mulo sa mga nars, napugos sila nga mogahin og mas taas nga oras sa pamuo tungod kay kulang sa empleyado ang ospital. Tungod niini apektado ang kalidad sa ilang serbisyo. Matud nila, mayorya kanila nagatrabaho hangtud 12 ka oras matag adlaw.

Sa kasamtangan adunay 965 ka empleyado ang ospital kung asa 579 niini mga myembro sa unyon. Niadtong Pebrero 11, mayorya sa mga myembro sa unyon ang miboto pabor sa welga. Naghaon sila og *notice of strike* sa Department of Labor and Employment (DOLE) human nga wala magkasinatob ang unyon ug administrasyon. Gibutyag usab sa unyon nga nagapatuman sa kontraktwalisasyon ang USTH. Ginapabayad usab ang mga bagong empleyado og *training fee* nga nagkantidad og P5,000-P7,000.

Samtang usa ka *prayer vigil* usab ang gipahigayon sa mga mamumuo sa Organization of Zagu Workers (ORGANIZA) niadtong Pebrero 19 atubangan sa upisina sa Zagu Food Corporation aron babagan ang pagpangdaut niini sa ilang unyon ug kontra-mamumuong mga palisiya sa kumpanya. Dili pa lang dugay, naghaon og *notice of strike* ang ORGANIZA sa National Conciliation and Mediation Board.

Sa Baguio City, nabutyag ang dakung kakulangan sa mga inspektor sa DOLE aron segurohon nga nagatuman ang mga kumpanya sa kasegurohan sa panglawas ug kaluwasan sa mga mamumuo. Sa 20,000 ka negosyo sa syudad, aduna lamay 16 ka mga *labor inspector*, nga mao usay nadistino sa tibuok rehiyon. Sa tibuok nasud, 800 ka inspektor lamang ang anaa alang sa kapin 900,000 ka negosyo. AB

Ika-100 ka tuig nga anibersaryo sa Comintern, gidumdum

GIDUMDUM SA PANGKALIBUTANG hut-ong proletaryado ang ika-100 ka tuig nga anibersaryo sa pagkatukod sa Third International o Communist International (Comintern) sa Unang Kongreso niini sa Moscow niadtong Marso 2-6, 1919. Resulta ang Comintern sa malampuson nga Batugang Proletaryong Rebolusyong Oktubre nga nagtukod sa diktadurya sa proletaryo sa Russia ug nag-abli sa pito ka dekadang malampuson nga sosyalistang rebolusyon ug konstruksyon sa 1/3 sa tibuok kalibutan. Malampuson nga gipasi-ugdahan sa Comintern ang pagpaasdang sa pangkalibutanong proletaryong rebolusyon ug ang pagtabang sa pagtukod sa mga Partido Komunista sa lain-laing bahin sa kalibutan. Aduna kini malukpanon nga rebolusyonaryong impluwensya ug mga bunga hangtud sa pormal nga pagwala niini niadtong 1943.

Niadtong Marso 1, nagpagula si Jose Maria Sison, *founding chairman* sa Partido Komunista ng Pilipinas, sa usa ka artikulo kung asa gisaysay ang makasaysayanong papel sa Comintern sa pagtabang sa pagpalig-on sa Communist Party of the Philippine Islands (CPPI), ang kanhing Partido Komunista ng Pilipinas, sukad nga gitukod kini niadtong 1930. Mabasa sa *website* sa PKP sa www.philippinerevolution.info ang tibuok artikulo. AB

DPRK, wala nagpabraso sa US

WALAY NAKAB-OT NGA kasabutan o gihiusang pamahayag ang subling panagkita sa lider sa Democratic People's Republic of Korea (DPRK o North Korea) nga si Kim Jong Un sa presidente sa US nga si Donald Trump niadtong ulahing semana sa Pebrero sa Vietnam. Tumong sa maong panagpulong nga subling hisgutan ang denukleyarisasyon sa DPRK, usa ka kasabutan nga naabot sa unang panagpulong niadtong nangaging tuig sa Singapore. Una na kining nahiusahan sa DPRK ug Republic of Korea (mas naila isip South Korea) isip inisyal nga lakang padulong sa reunipikasyon sa Korea. Wala miunyon ang DPRK nga sugdan gilayon ang pagguba sa mga pasilidad nukleyar niini nga wala ginaatras sa US ang gipahamtang niining *economic sanction* sa nasud. Ang maong *sanction* nagabawal sa daghang nasud nga makigpamatigayon sa DPRK. Tungod niini, limitado ang komersyo sa DPRK, ug napugos kini nga mosalig sa pakigpamatigayon sa China ug sa uban pang independyenteng mga nasud.

Tin-aw nga wala gibuhian sa DPRK ang katakus niini nga momugna ug mogamit og armas-nukleyar sa walay hinungdan nga konsesyon gikan sa US. Ang nukleyar nga arsenal niini ang usa sa pinakagamhanang armas batok sa direktang agresyon ug interbensyon sa US, ingon usab sa agresyon niini gamit ang South Korea nga kanhi nang gipwestuhan sa US og mga tropa ug kaugalingon niining armas nukleyar. Lakip sa mga ginaduso sa DPRK sa US ang pagpatumaw og tratadong pangkalinaw tali sa North ug South Korea, hinanali nga paghugka sa *economic sanction*, pagtapos sa mga *war game* sa utlanan ug kadagatan niini ug ibanan ang mga tropa sa US sa South Korea. Sa kasamtangan, adunay 28,500 ka tropa ang US sa utlanan sa DPRK ug South Korea.

Gikan sa unang panagpulong, gisuspinde na sa DPRK ang *missile* ug *nuclear testing* niini. Samtang, ang gihimo pa lamang sa US mao ang temporaryong pagsuspinde sa dinagkung mga *war game* tali niini ug hukbo sa South Korea. Padayon usab nga nakapusi-syon sa kadagatan ug mga base niini sa Asia ang kaugalingon niining mga pwersang nukleyar (submarino, barko ug eroplano) nga andam niining gamiton batok sa DPRK. AB